

山海經

丙辰孟秋

貴池劉世珩

山

海

經

卷之八

潮陽鄭
氏用郝
氏遺書
本校刊

欽定四庫全書提要

山海經十八卷晉郭璞注卷首有劉秀校上奏稱爲伯益所作案山海經之名始見史記大宛傳司馬遷但云禹本紀山海經所有怪物余不敢言而未言爲何人所作列子稱大禹行而見之伯益知而名之夷堅聞而志之似乎卽指此書而不言其名山海經王充論衡別通篇曰禹主行水益主記異物海外山表無不至以所見聞作山海經趙煜吳越春秋所說亦同惟隋書經籍志云蕭何得秦圖書後又得山海經相傳夏禹所記其文稍異然似皆因列子之說推而衍之觀書中載夏后啟周文王及秦漢長沙象

郡餘餘暨下嚮諸地名斷不作於三代以上殆周秦間人
所述而後來好異者又附益之歟觀楚詞天問多與相符
使古無是言屈原何由杜撰朱子楚詞辨證謂其反因問
而作似乎不然至王應麟王會補傳引朱子之言謂山海
經記諸異物飛走之類多云東向或曰東首疑本因圖畫
而述之古有此學如九歌天問皆其類云云則得其實矣
郭璞註是書見於晉書本傳隋唐二志皆云二十三卷今本
乃少五卷疑後人併其卷帙以就劉秀奏中一十八篇之
數非闕佚也隋唐志又有郭璞山海經圖讚二卷今其讚
猶載璞集中其圖則宋志已不著錄知久佚矣舊本所載

劉秀奏中稱其書凡十八篇與漢志稱十三篇者不合七
畧卽秀所定不應自相牴牾疑其贋託然璞序已引其文
相傳旣久今仍併錄焉書中序述山水多參以神怪故道
藏收入太元部競字號中究其本旨實非黃老之言然道
里山川率難考據案以耳目所及百不一真諸家竝以爲
地理書之冠亦爲未允核實定名實則小說之最古者爾

山海經箋疏敘

山海經古本三十二篇劉子駿校定爲一十八篇卽郭景純所傳是也今攷南山經三篇西山經四篇北山經三篇東山經四篇中山經十二篇并海外經四篇海內經四篇除大荒經已下不數已得三十四篇則與古經三十二篇之目不符也隋書經籍志山海經二十三卷舊唐書十八卷又圖讚二卷音二卷竝郭璞撰此則十八卷又加四卷才二十二卷復與經籍志二十三卷之目不符也漢書藝文志山海經十三篇在形法家不言有十八篇所謂十八篇者南山經至中山經本二十六篇合爲五臧山經五篇加海外經已下八篇及大荒經已下五篇爲十

八篇也所謂十三篇者去荒經已下五篇正得十三篇也古本此五篇皆在外與經別行爲釋經之外篇及郭作傳据劉氏定本復爲十八篇卽又與藝文志十三篇之目不符也酈善長注水經云山海經蘊縕歲久編章稀絕書策落次難以緝綴後人假合多差遠意然則古經殘簡非復完篇殆自昔而然矣藝文志不言此經誰作劉子駿表云出於唐虞之際以爲禹別九州任土作貢而益等類物善惡者山海經王仲任論衡趙長君吳越春秋亦稱禹益所作顏氏家訓書證篇云山海經禹益所記而有長沙零陵桂陽諸暨由後人所羈非本文也今攷海外南經之篇而有說文王葬所海外西經之篇而有說夏后啟事夫

經稱夏后明非禹書篇有文王又疑周簡是亦後人所羈也至於郡縣之名起自周代周書作雒篇云爲方千里分以百縣縣有四郡春秋哀公二年左傳云克敵者上大夫受縣下大夫受郡杜元凱注云縣百里郡五十里今攷南次二經云縣多土功縣多放士又云郡縣大水縣有大繇是又後人所羈也大戴禮五帝德篇云使禹敷土主名山川爾雅亦云從釋地已下至九河皆禹所名也觀禹貢一書足覘梗概因知五臧山經五篇主於紀道里說山川眞爲禹書無疑矣而中次三經說青要之山云南望澤渚禹父之所化中次十二經說天下名山首引禹曰一則稱禹父再則述禹言亦知此語必皆後人所羈矣然以此

類致疑本經則非也何以明之周官大司徒以天下土地之圖周知九州之地域廣輪之數土訓掌道地圖道地慝夏官職方亦掌天下地圖山師川師掌山林川澤致其珍異籙師辨其正陵墳衍遷陞之名物秋官復有冥氏庶氏亢氏翬氏柞氏薙氏之屬掌攻天鳥猛獸蟲豸草木之怪蠶左傳稱禹鑄鼎象物而爲之備使民知神姦民入山林川澤禁禦不若螭魅罔兩莫能逢旃周官左氏所述卽與此經義合禹作司空灑沈澹災燒不暇潰濡不給挖身執蘖垂以爲民先爰有禹貢復著此經尋山脈川周覽無垠中述怪變俾民不眊美哉禹功明德遠矣自非神聖孰能修之而後之讀者類以夷堅所志方諸齊諧不亦非

乎古之爲書有圖有說周官地圖各有掌故是其證已後漢書
王景傳云賜景山海經河渠書禹貢圖是漢世禹貢尙有圖也
郭注此經而云圖亦作牛形又云在畏獸畫中陶徵士讀是經
詩亦云流觀山海圖是晉代此經尙有圖也中興書目云山海
經圖十卷本梁張僧繇畫咸平二年校理舒雅重繪爲十卷每
卷中先類所畫名凡二百四十七種是其圖畫已異郭陶所見
今所見圖復與繇雅有異良不足据然郭所見圖卽已非古古
圖當有山川道里今攷郭所標出但有畏獸仙人而於山川脈
絡卽不能案圖會意是知郭亦未見古圖也今禹貢及山海圖
遂絕跡不復可得禹貢雖無圖其書說要爲有師法而此經師

訓莫傳遂將湮泯郭作傳後讀家稀絕途徑榛蕪迄於今日脫
亂淆譌益復難讀又郭注南山經兩引璨曰其注南荒經昆吾
之師又引音義云云是必郭已前音訓注解人惜其姓字爵里
與時代俱湮良可於邑今世名家則有吳氏畢氏吳徵引極博
汎濫於羣書畢山水方滋取證於耳目二書於此經厥功偉矣
至於辨析異同采正譌謬蓋猶未暇以詳今之所述并採二家
所長作爲箋疏箋以補注疏以證經卷如其舊別爲訂譌一卷
附於篇末計創通大義百餘事是正譌文三百餘事凡所指擿
雖頗有依據仍用舊文因而無改蓋放鄭君康成注經不敢改
字之例云嘉慶九年甲子二月廿八日棲霞郝懿行撰

刻山海經箋疏序

左傳稱禹鑄鼎象物使民知神姦禹鼎不可見今山海經或其
遺象歟漢書藝文志列山海經於形法家後漢書王景傳明帝
賜景山海經河渠書以治河然則是經爲山川輿地有功世道
之古書非語怪也且與此經相出入者則有如逸周書王會楚
辭天問莊列爾雅神農本草諸書司馬子長於山經怪物不敢
言之史家立法之嚴固宜耳然上古地天尙通人神相雜山澤
未烈非此書末由知已郭景純注於訓詁地理未甚精徹然晉
人之言已爲近古吳氏廣注徵引雖博而失之蕪雜畢氏校本
於山川考校甚精而訂正文字尙多疏略今郝氏究心是經加

以箋疏精而不鑿博而不濫粲然畢著斐然成章余覽而嘉之
爲之槧版以傳郝氏名懿行字蘭皋山東棲霞人戶部主事余
己未總裁會試從經義中識拔實學士也家貧行修爲學益力
所著尙有爾雅疏諸書蘭皋妻王安人字瑞玉亦治經史與蘭
皋共著書於車鹿春廡之間所著有詩經小記列女傳注諸書
於此經疏並多校正之力亦可尙異之也

嘉慶十四年夏四月揚州阮元序

山海經箋疏審定校勘爵里姓氏

儀徵阮雲臺侍郎

元

陽湖孫伯淵觀察

星衍

武進臧西成文學

庸

歸安姚秋農中允

文田

高郵王曼卿學士

引之

全椒吳山尊學士

肅

歙縣鮑覺生學士

桂星

嘉應宋芷灣編修

湘

閩縣陳梅修編修

壽祺

江西新城涂瀾莊侍御以朝

商城程鶴樵侍御國仁

南海張棠村員外業南

龍南徐香珏主事名紱

桐城馬元伯主事瑞辰

曲阜孔阜村主事繼堉

烏程嚴鐵橋孝廉可均

儀徵阮小雲蔭生常生

棲霞牟默人明經廷相